



NEDERDUITSE GEREFORMEERDE KERK DUTCH REFORMED CHURCH

Posbus/PO Box 13528

HATFIELD 0028 SA

Tel +27 (0)12 342 0092 Fax +27 (0)12 342 0380

algemenesinode@ngkerk.org.za www.ngkerk.org.za

29 Februarie 2012

Liewe susters en broers in Christus

KERKHERENIGINGSPROSES

Die dagbesture van die VGKSA en die NG Kerk het op 23-25 Februarie 2012 in Johannesburg ontmoet as deel van die voortgaande fasiliteringsproses onder leiding van dr Jerry Pillay, president van die Wêreldgemeenskap van Gereformeerde Kerke (World Communion of Reformed Churches (WCRC)).

Ons herinner u aan die agtergrond van die proses:

Op die 1ste Oktober 2008 het die Algemene Sinode van die VGKSA besluit:

- *General Synod decides to put a moratorium on the re-unification talks between the URCSA and DRC until the DRC is seriously committed and ready for unity talks.*
- *General Synod mandates the executive to invite WARC to come and facilitate the process of re-unification of these churches who are members of WARC. This request is based on the letter of WARC dated 11/08/08.*
- *That inasmuch as the same convictions are held by the DRCA and the RCA this decision holds for those two churches as well.*
- *That the faith, courage and work of regional synods, presbyteries, commissions of the church and local congregations be respected and honoured by encouraging them, where all efforts towards unification are done in faith and with integrity, in obedience to the call of Christ and on the basis of the acceptance of the Confession of Belhar, to continue with these efforts; to thereby remain signs of hope, reconciliation and love to the fulfillment of justice, the edification and witness of the church and the glory of God.*

In Maart 2009 het 'n afvaardiging van die destydse Wêreldbond van Gereformeerde Kerke (WARC) verteenwoordigers van die VGKSA en die NG Kerk ontmoet. Die uitkoms van die konsultasie was dat die twee kerke onder leiding van dr Jerry Pillay met mekaar op reis sou gaan om aan die volgende sake aandag te gee:

- *Respek vir die moratorium van die VGKSA*
- *'n Gemeenskaplike **verbinten**is tot hereniging*
- *Wedersydse bystand aan mekaar ten opsigte van 'n ernstige en positiewe studie van die waarde en belang van die **Belydenis van Belhar** vir die herenigde kerk*
- *'n Gemeenskaplike poging ten opsigte van **herstellende geregtigheid en versoening***
- *Berekende pogings om verhoudings tussen lidmate van die kerke te bou.*

As uitvloeisel van die konsultasie het die twee kerke besluit om drie taakspanne aan te wys wat sou saamwerk ten opsigte van drie sake, naamlik die verbintenis tot hereniging, die Belydenis van Belhar, asook herstellende geregtigheid en versoening. Hierdie taakspanne was intussen besig, maar kon as gevolg van verskeie faktore nie die werk doen wat hulle beoog het nie.

Die Algemene Sinode van die NG Kerk het in Oktober 2011 met 'n oorweldigende meerderheid ten gunste van die aanvaarding van die Belydenis van Belhar besluit. Dit is gedoen omdat die Sinode oortuig was dat die waarheid van Belhar 'n waarheid is wat nou bely moet word en 'n waarheid is wat die kerke in Suid-Afrika met hulle getuïenisse kan help. Ons is oortuig dat hierdie besluit die werk van die Heilige Gees was en ons dank God dat Hy steeds sy Kerk deur Woord en Gees regeer. Die Algemene Sinode van die NG Kerk het ook besluit om die Belydenis van Belhar op 'n kerkordelike wyse deel van die NG Kerk se belydenisgrondslag te maak. In 'n verdere belangrike besluit wat aanvaar is, verklaar die NG Kerk dat 'n organiese model van kerkhereniging ondersteun word. Ons neem ook kennis daarvan dat die VGKSA positief op hierdie besluite gereageer het.

In die lig van die besluite van die Algemene Sinode van die NG Kerk het dr Jerry Pillay 'n vergadering tussen die VGKSA en die NG Kerk belê om die implikasies van hierdie besluite vir die fasiliteringsproses te bespreek. Na 'n vergadering in November 2011 is besluit dat die twee dagbesture meer tyd nodig het vir ontmoetings en om saam op hierdie reis te wees.

Vir die afgelope ontmoeting van die twee dagbesture is besluit om te fokus op die bou van verhoudings tussen die leierskapgroepe, die Belydenis van Belhar saam te lees en ook met mekaar te deel watter uitdagings daar vir die reis vorentoe is. Hierdie ontmoeting was baie meer as net 'n formele vergadering om 'n agenda te hanteer. Saam het ons ons voor God verootmoedig en onder leiding van sy Gees geluister na wat Hy vir ons uit sy Woord, die Belydenis van Belhar en die lewensverhale van die afgevaardigdes sê. Dit was 'n verrykende ervaring om so saam te wees. Vir die eerste keer in ons gesprekke was die Belydenis van Belhar ons gemeenskaplike vertrekpunt vir die pad vorentoe. Ons dank God vir die vars wind wat Hy gestuur het, die wedersydse vertroue in mekaar se leierskappe, asook die besluite van die Algemene Sinode van die NG Kerk. Dit het 'n nuwe deur in die fasiliteringsproses geopen om die drie spesifieke sake te hanteer: verbintenis tot kerkhereniging, die Belydenis van Belhar en herstellende geregtigheid en versoening.

Ten opsigte van die pad vorentoe is besluit dat die dagbesture die fasiliteringsproses onder leiding van dr Jerry Pillay voortsit ten einde die sake wat tydens die ontmoeting geïdentifiseer is, verder uit te werk. Taakspanne sal besprekingsdokumente voorberei oor eenheid, die Belydenis van Belhar en herstellende geregtigheid. Oor eenheid sal die verslag van die taakspan moet uitspel wat verstaan word ten opsigte van organiese eenheid en hoe dit op 'n kerkordelike wyse bereik kan word. Hulle sal ook moet hulp verleen oor op watter maniere 'n verbintenis tot eenheid in beide kerke gevoed kan word. Die taakspan vir Belhar sal verslag doen oor 'n begeleidende brief van die NG Kerk vir die Belydenis van Belhar en die proses vir die volle aanvaarding van Belhar in die NG Kerk. Die taakspan vir herstellende geregtigheid en versoening sal 'n verslag voorsien oor wat reeds gedoen is oor eiendomskwessies en ook versoening.

Wanneer ons terugkyk na die ontmoeting en proses stem ons saam dat ons God se teenwoordigheid en die leiding van die Heilige Gees ervaar het. Ons is oortuig dat ons vordering gemaak het in die bou van verhoudings en vertroue, asook 'n verbintenis tot die fasiliteringsproses. Ons dank God vir sy seëninge.

Ons versoek lidmate van die VGKSA en die NG Kerk om te bid dat God die proses sal seën en ons sal lei tot by 'n punt waar ons 'n herenigde kerk tot eer van God is. Ons as die leierskap van die kerke verbind onself om saam te werk in gehoorsaamheid aan God en om die lidmate van ons kerke ingelig te hou oor die proses.

As deel van die WCRC se fasiliteringsproses is ons nou by 'n stadium waar die WCRC die ander lede van die NG Kerkfamilie, nl die NG Kerk in Afrika (NGKA) en die Reformed Church in Africa (RCA), kan uitnooi na ons volgende ontmoeting.

In die diens van Christus en sy Kerk!

Dr Jerry Pillay: President van die Wêreldgemeenskap van Gereformeerde Kerke
jpillay@presbyterian.org.za 082 719 3531

Dr Kobus Gerber: Algemene Sekretaris van die NG Kerk
kobusg@ngkerk.org.za 082 895 5680

Dr Dawid Kuyler: Skriba van die Algemene Sinode van die VGKSA
dkuyler@telkomsa.net 083 274 7616